



Монголын Үйлдвэрлэлийн Хөгжлийн Төлөө



Энэ дугаарт:

Nr. 2 / 2018

- Бизнес аялал – Швейцарь. 2018
- Д.Ариунцэцэг “Швейцарийн бизнес эрхлэгчдийн амжилтын нууц”
- Сургалтуудын хуваарь



Маркус Эппер

БPN Монгол салбарын үйл ажиллагаа хариуцсан захирал

БPN Монгол салбарын зүгээс Швейцарийн Холбооны улсад 2018 оны 10 дугаар сарын 14-нөөс 19-ний хооронд 5 өдрийн хугацаатай бизнес аяллыг амжилттай зохион байгууллаа. Энэ удаагийн бизнес аялалд БPN-ийн хөтөлбөрийн оролцогчдоос:

- “Мөнхбумууд” ХХК-ийн Гүйцэтгэх захирал О.Батсуурь
- “Сайн Хөрш Эмнэлэг”-ийн Үүсгэн байгуулагч, Захирал Р.Баттөмөр
- “Мөнх-Ариун Ундарга” ХХК-ийн Гүйцэтгэх захирал Д.Ариунцэцэг
- “Их газрын чулуу” ХХК-ийн Гүйцэтгэх захирал П.Баяржаргал
- “Хат Хүлэг” ХХК-ийн Ерөнхий захирал Э.Хэрлэнтуул, Гүйцэтгэх захирал Ч.Энхбат,
- “Батхүлэг Тур” ХХК-ийн Захирал Б.Ундранаа
- Үндэсний хувцасны салоны Захирал Х.Ууганцэцэг нарын нийт 8 бизнес эрхлэгч оролцлоо.

Аяллын оролцогчид маань БPN-ийн Швейцарь дахь төвийн удирдлагуудтай уулзаж, санал бодлоо солилцон, БPN-ийн үүсгэн байгуулагч Jürg Opprecht (Юүрг Оппрехт) Монголын багийг тусгайлан хүлээн авч, хүндэтгэл үзүүлсэн нь бизнес эрхлэгчдэд урам зориг өгсөн явдал боллоо.

Түүнчлэн бизнес эрхлэгчид нь дэлхийд танигдсан, Швейцарийн Холбооны Улсын нэр хүндтэй үйлдвэрүүд болох Victorinox –Хутганы үйлдвэр, Läderach-Шоколад үйлдвэрлэл, Reinhard-Талх, нарийн боов үйлдвэрлэл, Hugentobler -Нийтийн хоолны тоног төхөөрөмж үйлдвэрлэл, Jensen- авто засварын төв, Ronda-цагны доторх эд анги үйлдвэрлэл зэрэг үйлдвэрүүдээр зочлон, үйл ажиллагаатай нь танилцан, туршлага судаллаа. Мөн аяллын багийнхан Швейцарийн байгалийн үзэсгэлэнт газруудаар аялан цагийг дурсамж дүүрэн өнгөрөөлөө.

Бизнесээ амжилттай удирдан явуулж буй Швейцарийн бизнес эрхлэгчдийг амжилтад хүргэдэг хүчин зүйлсийг бодитоор үзэж танилцах нь ховорхон тохиох завшаан билээ. БPN Бизнес эрхлэгчдийн нийгэмлэг нь 2019 онд дахин Швейцарийн бизнес аялалыг зохион байгуулахаар төлөвлөж байна. Бид хөтөлбөрийн оролцогчдынхоо үйл ажиллагааны салбарт тохируулан туршлага судлан, зочлох үйлдвэрүүдэд нарийн сонгон шалгаруулж, зохион байгуулахаас гадна



“Энэ удаагийн бизнес аялал нь бизнес эрхлэгчдийн маань хувьд шинэ санаагаар дүүрэн, үр өгөөжтэй аялал байж чадсанд бид баяртай байна”

үндсэн хөтөлбөрийн турш мэргэжлийн орчуулга хийгдэх болно.

БPN-ийн зүгээс Швейцарийн Холбооны Улсын үйлдвэрүүдтэй танилцан, туршлага судлах бизнес аяллыг та бүхэнд олгож байна.

БPN Сонгон шалгаруулалт хариуцсан зохицуулагч О.Эрдэнэсүрэн:

Удирдах нь үйлчлэл юм:

БPN Нийгэмлэгийн зүгээс “Бизнес аялал – Швейцарь. 2018” туршлага судлах аяллыг зохион байгууллаа.

Хөтөлбөрийн оролцогчдын хамт миний бие зохион байгуулагч, орчуулагчийн үүргийг гүйцэтгэн, Швейцарийн бизнес эрхлэгчид нь хэрхэн амжилтад хүрч, чанартай бүтээгдэхүүн үйлдвэрлэж байгаатай очиж танилцлаа.

Аяллын хүрээнд нийтийн хоолны тоног төхөөрөмж үйлдвэрлэгч “Hugentobler Schweizer Kochsystem” ХК-тай зочлох уулзалтыг зохион байгуулж, үйлдвэрийн техник технологи, үйл ажиллагаатай нь танилцав. Энэ үеэр тус компанийн үндэслэгч, ТУЗ-ийн дарга н. Fredy Hugentobler “УДИРДАНА гэдэг нь ҮЙЛЧИЛНЭ” гэсэн үг хэмээн онцлон иш татаж хэллээ. Мөн хийж байгаа зүйлдээ “ХАЙР” шингээж, чин сэтгэлээсээ ажиллах нь амжилтад хүрэх нэг алхам болдог хэмээн онцолсон юм. Өнөөдөр хүний нөөцийн удирдлага нь манай улсын ЖДҮ эрхлэгчдийн хамгийн тулгамдаж буй асуудлын нэг бөгөөд аялалын оролцогчдын хувьд маш сонирхолтой сэдэв байж энэ талаар санал бодлоо хуваалцлаа.

Ажилтан бүр “Алсын хараа” тодорхойлоход нэг хэсэг нь байж, түүнтэйгээ уялдуулан ажлын төлөвлөгөөгөө боловсруулан ажиллах нь тэмүүлэлтэй, тогтвор суурьшилтай ажиллах үндэс болдог байна.

“Удирдагч” хүний хувьд гол үнэт зүйл нь тэдний ажиллагсад нь байдаг гэдгийг бидний зочилсон үйлдвэрийн удирдлагууд онцолж байлаа.

Энэхүү аялал нь хөтөлбөрийн оролцогчидод шинэ алсын ХАРАА, ажлын урам зориг өгч өөрсдийн үйл ажиллагааг өөр өнцгөөс харах боломж олгосон аялал боллоо.

БPN нийгэмлэгийн зүгээс уг бизнес аялалыг жил бүр уламжлал болгон зохион байгуулж хөтөлбөрийн оролцогчдоо хамруулан, сургалтаар олж авсан мэдлэгийг баталгаажуулахыг зорин ажиллах болно.

Д.Ариунцэцэг

“Мөнх-Ариун Ундарга ХХК-ийн Гүйцэтгэх захирал”

Миний бие 2014 оноос BPN байгууллагын хөтөлбөрт хамрагдан, хөтөлбөрийнхөө дагуу Швейцарийн Холбооны Улсыг зориод ирлээ. Хэдийгээр бид богино хугацаанд шахуу хөтөлбөртэй явсан боловч бидний хувьд маш үр дүнтэй, өгөөжтэй аялал боллоо.

Миний хувьд би үйлдвэрлэгч биш үйлчилгээний бизнес эрхэлдэг. Тиймээс үйлчлүүлж байгаа газар бүр маань миний суралцах талбар болж байлаа.

Бидний хамгийн эхэнд зочилсон үйлдвэр бол Швейцарийн алдарт хутганы үйлдвэр болох Victorinox байлаа. Эндээс л бид үе дамжсан, гэр бүлийн зөв бодлогоор, бизнес хэрхэн явагддагийг харж авлаа. Үйлдвэрлэгдэн гарч буй бүтээгдэхүүн болгон чанарын өндөр төвшинд үйлдвэрлэгддэгийн гол учир нь ажиллагсдын тогтвортой, ажилдаа сэтгэл хангалуун, чин сэтгэлээсээ ажилдагт байлаа.

Бас нэг зүйл нь үйлдвэрээс гарч байгаа хаягдал төмрийн үртсийг бүтээгдэхүүн болгон дахин боловсруулж, саарал усыг байрны дулаан болгон дахин ашиглаж, хог хаягдалгүй үйлдвэрлэл явуулж байгаа нь үнэхээр гайхалтай санагдлаа. Бид яагаад чаддаггүй юм бэ гэсэн атаархал төрж байсныг нуух юун.

Үүний дараагаар талх, нарийн боовны үйлдвэрээр орж, танилцав. Уг үйлдвэр нь зөвхөн өөрийн орон нутгийн тариаланчдаасаа түүхий эдээ худалдан авч, үйлдвэрлэлээ явуулдаг аж. Энэ нь дотоодын үйлдвэрлэгчдээ дэмжих асар том бодлого болох нь харагдаж байна. Үйлдвэрлэлийн шат дамжлага бүрийн өчүүхэн хэсэгт ч анхаарч, ач холбогдол өгч аюулгүй ажиллагаагаа ханган ажиллах нь чанартай бүтээгдэхүүн үйлдвэрлэх нууц нь юм байна.

Дараагийн бидний танилцсан үйлдвэр бол цагны дотор механизм үйлдвэрлэдэг Ronda ХК байлаа. Энэ үйлдвэр нь дэлхийд алдартай ихэнх цагуудын зөвхөн дотор механизмыг үйлдвэрлэдэг. Тэд хэзээ ч эцсийн бүтээгдэхүүн буюу цаг үйлдвэрлэнэ гэсэн зорилго тавиагүй нь гайхмаар. Бид байсан бол аль хэдийн нэг мөсөн цаг



үйлдвэрлэнэ гэх байсан биз гэж надад бодогдлоо. Hugentobler-Schweizer Kochsystem ХК бол надад хамгийн их сэтгэгдэл үлдээсэн үйлдвэр. Бид эхлээд гал тогооны нийтийн хоолны тоног төхөөрөмж үйлдвэрлэн, худалдаалдаг газар орлоо гэж бодсон. Гэвч аливаа зүйлийг борлуулахад биш тэр зүйлийг хэн ашиглах вэ гэдэг нь хамгийн чухал зүйл болохыг хэзээ ч мартахааргүйгээр ойлгож авав. Гал тогооны тоног төхөөрөмжийн эцсийн хэрэглэгч нь хүн өөрөө тул бүх эд анги нь хүний эрүүл зөв хооллолт, бие махбодь руу чиглэсэн байж уг бүтээгдэхүүн амжилттай борлуулагддаг байх нь.

Jensen ХК-Машин засварын газар нь борлуулалтаас гадна үйлчлүүлэгч тус бүрийн мэдээллийг алдалгүй тэмдэглэн, ямар засвар үйлчилгээ хэрэгтэй байгааг кодлон мэдээлдэг, мэдээллийн санг үүсгэж чадсан нь гайхалтай юм. Машин засварын газар гэхэд тостой, бохир орчин биш загварын тайз шиг орчин биднийг угтсан.

Энэ бүгдээс харахад хүмүүсийн сэтгэлгээ, хийж байгаа ажилдаа чин сэтгэлээсээ дурлаж ажиллах, үнэнч байх зарчим, ажлын байран дээр мөрдөгддөг дүрэм журмыг дээд доод албан тушаалтан гэлгүйгээр бүгд дагаж мөрдөн, ажлын байрандаа эмх цэгцтэй ажиллах нь аливаа ажлын амжилт юм гэдгийг аль ч газар, үйлдвэрээр орсон харж явлаа.

Мөнгө олно, бизнес хийнэ гэдэг утга учиртай байж, эргээд бидний бахархах зүйл болох ёстой юм байна гэдгийг эндээс мөн ойлгож авлаа.

Маш энгийн гаргалгаа буюу хийж байгаа зүйлдээ эзэн болох зарчим. Энэ л тэдний амжилтын нууц нь юм.

Их зүйлийг бодож тунгаан, алсын хараагаа зөв харах, хийж байгаа ажилд маань ямар гарц, нөөц бололцоо байгааг ойлгуулж өгсөн BPN-ийн хамт олондоо маш их баярлалаа. Дараагийн бизнес аяллыг тэсэн ядан хүлээж байна.



Сургалтуудын хуваарь



Хүний нөөцийн удирдлага 2018.12.03-12.04 /2 өдөр/

Агуулга:

Хүний нөөцийн стратеги, хүний нөөцийн төлөвлөлт, хүний нөөцийн бүрдүүлэлт ба сонгон шалгаруулалт, сургалт хөгжил, ажиллагсдыг сэдэлжүүлэх буюу хүмүүсийн тогтвор суурьшилтай ажиллуулахад нөлөөлөх хүчин зүйлс, зөрчилдөөн, үл ойлголцлыг үр дүнтэй удирдах нь, авъяасын удирдлага, ажиллагсдын карьер хөгжил, гүйцэтгэлийн үнэлгээ, гүйцэтгэлийн удирдлага



Цагийн менежмент 2019.03.01-03.02 /2 өдөр/

Агуулга:

Цаг төлөвлөлтийн 10 дүрэм, цаг төлөвлөлтийн чухал хэрэгслүүд болох дэвтэр болон цахим хуанлтай дэлгэрэнгүй танилцаж, тэдгээрийг зөв ашиглах арга барил эзэмшинэ. Мөн сургалтын оролцогч бүр үйл ажиллагаандаа уялдсан хувийн төлөвлөгөө гаргах ба цаашид ажил, амралт чөлөөт цагаа зөв төлөвлөн зохион байгуулж стрессгүй, тэнцвэртэй амьдарснаар амжилт таны гарт ирэх болно.



Санхүүгийн менежмент 2019.03.20-03.23

Агуулга:

Санхүүгийн менежмент удирдах хэрэгсэл болох нь, компанийн хөрөнгө, бизнес эрхлэгчийн хариуцлага, эргэлтийн хөрөнгийн менежмент, санхүүгийн тайлан баланс, үр дүнгийн тайлан, тооцооллын чухал аргачлалууд, санхүүгийн гол үзүүлэлтүүдийг ашиглах, үнэ / өртөг тооцох, бизнес эрхлэгчийн удирдлагын арга хэрэгсэл, хугарлын цэг – Үйлдвэрийн зардал, ашиг алдагдлыг тооцох



Маркетинг 2019.03.25 - 03.29

Агуулга:

ЖДҮ-ийн зах зээлийн гол механизмууд, нөхцөл байдлын шинжилгээ: зах зээлийн бүтэц, зах зээлийн өөрчлөлтийг урьдчилан таамаглах, маркетингийн гол хэрэгслүүдтэй танилцах, маркетингийн иж бүрдэл: бараа бүтээгдэхүүний нийлүүлэлт, хувиарлалт, маркетингийн төлөвлөгөө боловсруулах, төсөв Мк-Кинзи загвар, хэрэглэгчидтэй харилцах, маргаан санал гомдлыг хүлээн авах, компанийнхаа маркетингийн төлөвлөгөө боловсруулах, танилцуулах

Сургалт болон хөтөлбөрийн талаарх дэлгэрэнгүй мэдээллийг манай вэб хуудаснаас авна уу.

WWW.BPN.MN



Хаяг: СБД, 8-р хороо, Оюутны 33
"ТАНАН" төв, 404 тоот
Утас: 77113309, 70113309
Э-шуудан: info@bpn.mn